

Enn scheene Zuch

Was hawwe die Flerschemer om Sunndaach widder ferr Glick gehabt. Moijens hotts noch wie verrickt gereechent unn midaachs wars schennsde Wedder, doo macht des werklich Spass beim Fassenachtszuch.

Wennde doo stiehst unn zuguckst, wersde uff omol gonz stolz uff Flerschem unn uff die Flerschemer. Erstens, weil dess widder enn gonz starke Zuch iss, wo de Spass an de Freud wie Feierfunke iwwerspringe dut von dene, die im Zuch mitlaafe odder mitfahrn, unn uns, die on de Stroose odder on de Fenster sinn, unn zweitens weil aach die Auswerdische unn die Ausländer bei uns gut uffgehowwe sinn; on so em Daach isses halt wie im Urlaub, woode joo aach mett wildfremde Mensche so babbele unn lache dust, als ob mer sich schunn ewich kenne det. Merr werd jetz saache, es kann joo nit dess gonze Johr Fassenacht soi, awwer e bisje was von dem geecheseidische Schulterkloppe könnt mer sich schunn uffhewe ferr die nechste Woche.

Dess fengt schunn mit de Bolizei oo. Ob die mett ihrne Gail vorneweg reide odder mett em Audo im Zuch mettfahrn odder aach on de Stroos stehe unn uffbasse, die sehe uff oomal garnimmehr so streng aus wie sunnst. Dess kimmt awwer doodefoo, dass aach die gonze Falschparker, Nit-Ooschnaller und Schnellfahrer dissmol uff de Fieß unn nit im Audo sinn. Wenn halt zwische de Mensche e paar Autoscheiwe sinn, doo konnste nit onnerst als bees gucke, sonst wersde nit ferr voll genumme, dess geheert halt zum Immitsch, ferr uns unn aach ferr die Bolizei.

Awwer was onnerst: Wennde unne in de Hauptstroos, on de Kerch, de Zuch sehe willst, doo war der die gonze Johnn so verrobbt, doo musde erst in doi Heftche gucke, ob der aach nit schon ferdich war, awwer dissmol hotts gut geklappt, doo warn nur zwaa große Löcher, mehr nit; so e geschlosse Zuchformation iss halt nit so leicht dorchsehale, weil vorne sinn halt mehr auswärtiche Gruppe, die hoom wolle, unn weiter hinne sinn die FlerschemerASSE, die öfters stehebleiwwen unn mett ihrne Fenns schunkele wolle.

Unn: Wo getrunke werd, werd aach gepinkelt. Die Stadt waas dess unn hott iwwerall so Heisjer uffgestellt. Awwer wahrscheinlich sinn die e bisje eng, doo geht joo immer nor ooner noi, ferr uffem Bau iss dess joo gonz gut, awwer für so e Veroostaltung halt nit. Weil dann wär nit dess bassiert, was ich doo on ooner Mauer gesehe hab: Doo hott so en Villdrinker in ooner Hond e Bierflasch, aus der er trinke dut, unn in de onnern Hond e Handy, mit dem er telefoniert, unn weil er halt nor zwaa Händ hott, musst em soi Fraa beim Pinkele helfe. Unn doodeferr brauch mer halt gresern Heisjer.

Eiern Honnes